

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 268975 25 St
Zenica, 02.04.2026. godine

Općinski sud u Zenici, stečajna sutkinja Sanja Pavlić, u stečajnom postupku nad društvom Nova Željezara Zenica, d.o.o., ul. Bulevar Kralja Tvrtka I broj 17., koji je pokrenut po prijedlogu predlagatelja Nova Željezara Zenica, d.o.o., ul. Bulevar Kralja Tvrtka I broj 17., koga zastupa Ahmed Hamzić, generalni direktor društva, odlučujući o prijedlogu privremenog stečajnog upravitelja Hadžirašidović Jasmina od 02.04.2026. godine, za donošenje mjere obezbjeđenja, donio je 02.04.2026.godine sljedeće:

R J E Š E N J E

Upravi stečajnog dužnika do donošenja odluke po prijedlogu za otvaranje stečajnog postupka, određuje se mjera obezbjeđenja, da pravne radnje stečajnog dužnika, postaju pravno valjane samo uz prethodnu suglasnost privremenog stečajnog upravitelja.

O b r a z l o ž e n j e

Prijedlogom od 17.12.2025. godine, predlagatelja društva Nova Željezara Zenica, d.o.o., ul. Bulevar Kralja Tvrtka I broj 17., pokrenut je stečajni postupak nad društvom Nova Željezara Zenica, d.o.o., ul. Bulevar Kralja Tvrtka I broj 17.

Sud je 11.02.2026. godine donio Rješenje o pokretanju prethodnog stečajnog postupka i za privremenog stečajnog upravitelja imenovao Hadžirašidović Jasmina.

Podneskom od 02.04.2026. godine privremeni stečajni upravitelj je dostavio sudu Prijedlog za određivanje mjere obezbjeđenja u skladu sa odredbom čl. 62. stav 6 tačka c), Zakona o stečaju, kojom je propisano da se određuje, da pravne radnje stečajnog dužnika, postaju pravno valjane samo uz prethodnu suglasnost privremenog stečajnog upravitelja.

U podnesku privremeni stečajni upravitelj navodi da je dužnik dana 02.04.2026. godine po Zahtjevu privremenog stečajnog upravitelja dostavio Izvode sa transakcijskih računa, a uvidom u iste utvrđeno je da je 01.04.2026. godine, izvršeno plaćanje prema pojedinim dobavljačima, iako je Uprava bila upoznata sa neposrednom opasnošću od obustave isporuke ključnih energenata. Privremeni stečajni upravitelj navodi da je takvim postupanjem Uprava dužnika postupila suprotno odredbama Zakona o finansijskom poslovanju, jer nije osigurala prioriteto izmirenje obaveza koje su od presudnog značaja za očuvanje imovine i sprečavanje nastanka veće štete. Kao dokaz takvim navodima u prilogu prijedloga, privremeni stečajni upravitelj je kao dokaz dostavio Izvode sa računa dužnika za 01.04.2026. godine. Kao dokaz da postoji neposredna opasnost od obustave isporuke ključnih energenata, privremeni stečajni upravitelj je dostavio Opomenu zbog dugovanja za električnu energiju JP Elektroprivrede Bosne i Hercegovine d.d. Sarajevo, koja je dostavljena stečajnom dužniku Nova Željezara Zenica d.o.o. i u kojoj se navodi da ukoliko Nova Željezara Zenica d.o.o. ne uplati prethodno dospjela dugovanja najkasnije do 24.03.2026. godine, JP Elektroprivreda d.d. Sarajevo će pokrenuti aktivnosti na obustavi isporuke električne energije, a također je kao dokaz dostavljen akt-Zahtjev za obustavu isporuke električne energije broj 04-9509-1/26 od 27.03.2026. godine.

Imajući u vidu gore navedeno, a uvažavajući prijedlog privremenog stečajnog upravitelja za donošenje mjere obezbjeđenja osnovanim, sud je odlučio kao u izreci rješenja u skladu sa odredbom čl. 62. stav 6. tačka c). Zakona o stečaju, ("Sl. novine F BiH" br. 53/2021 i 19/2025), uvjetujući da pravne radnje stečajnog dužnika, postaju pravno valjane samo uz prethodnu suglasnost privremenog stečajnog upravitelja, do donošenja odluke po prijedlogu za otvaranje stečajnog postupka.

PRAVNA POUKA:

Protiv ovog rješenja žalbu može
izjaviti stečajni dužnik u roku od 8
dana od prijema rješenja Kantonalnom sudu Zenica,
putem ovog suda.

STEČAJNA SUTKINJA

Sanja Pavlić

